

ԼԵՀԱՀԱՅՈՅ ԳԱՂԹԱՎԱՅՐԵՐԻ ՍԿԶԲՆԱԽՈՐՈՒՄԸ

ԸՍՏ ԼԵՀԱՀԱՅ ՊԱՏՄԱԲԱՆ

ՍԱԴՈԿ ԲԱՐՈՆՉԻ

(1814–1892)

25

Rys dziejow Ormianskich (Ուրուագծեր հայոց պատմութեան) գրքում Ս. Բարոնչը տալիս է Ռեզ Պոսպոլիտայի երբեմնի տիրոյթներում ստեղծուած կամ ժմ. դարակէսին Լվովի հայոց թեմակալի իշխանութեան տակ գտնուող հետեւեալ 37 հայկական գաղթավայրերի համառօտ պատմութիւնը՝ սկզբնաւորումից մինչեւ իր ապրած ժամանակը. Բար, Բալտա, Բարեկ (Դուգրովիցա), Բրոդի Բէրէժանի, Զէրնովցի, Դուբնո, Հորոդենկի, Եարոսլաւ, Եազլովեց, Կամենեց-Պոդոլսկ, Կազիմիր Դոլնի, Կիեւ, Կրակով, Կուտափ, Լուբլին, Լվով, Լուցկ, Լիսեց, Մոհիլով (Մոգիլով-Պոդոլսկ), Օբերտըն, Օրմիանէ, Օրմիանկի, Պոդհայցէ, Ռաշչով, Սատանով, Սնեատին, Ստուձենիցա, Ստանիսլաւ, Սուչաւա, Տըսմենից, Վարենժ, Վարչաւա, Զամոստիէ, Զոլոչով, Ժուկովա, Ժուանեց: Այս 37 բնակավայրերից բացի պատմաբանը հայոց գաղթօջախների առկայութիւնը ընդունում է Վիլնիուսում եւ ընդհանրապէս Լիտուայում, ինչպէս նաեւ Ժուկով, Ստրիյ (Լվովի մարզ) եւ Տորուն քաղաքներում, որոնց մասին խօսում է տողատակի ծանօթագրութիւններում:

Այսպիսով՝ Բարոնչը իր գրքում բերում է պատմական Լեհաստանի, Մոլդավիայի եւ Լիտուայի տարածքներում սկզբնաւորուած 41 գաղթավայրերի վերաբերեալ տեղեկութիւններ: Ցիշեալ 41 գաղթօջախների մեծ մասին անդրադառնում է շատ թուոցիկ՝ երբեմն մի քանի նախաղասութեամբ: Հիմնականում

խօսում է Լվովի մասին (էջ 104-152), համեմատաբար մեծ տեղ է յատկացնում Կամենեց-Պոդոլսկին (էջ 92-98), Սոգիլեւ-Պոդոլսկին (էջ 156-163), Հորոդենկային (էջ 81-86), Եազովեցին (էջ 87-92), Բալտային (էջ 72-76), Ստանիսլավին (էջ 167-171), Տըսմենիցին (էջ 172-175), Բերեժանիին (էջ 77-80), Զէրնովիցին (էջ 165-167) եւ Զամոստիէն (էջ 176-178): Մնացած գաղթավայրերին անդրադառնում է շատ սեղմ՝ մէկ-մէկուկէս էջով, իսկ երբեմն՝ մի քանի նախադասութեամբ:

Բարոնչի կարծիքով Ժ. դ. Կիեւեան Ռուսիա մտած հայերը ԺԳ-ԺԴ. դարերում շարժուել են Պոդոլիա ու Գալիցիա՝ հետագյում համալրուելով Հայաստանից, Ղրիմից, Սոլդատիայից ու այլ վայրերից եկած գաղթականներով։ Նա Ռեչ - Պոսպոլիտայի սահմաններում ծագած ամենավաղ գաղթավայրերը համարում է այժմ Կամենեց - Պոդոլսկի արուարձանները հանդիսացող Օրմիանէ եւ օրմիանկի Գիւղերը, Կամենեց - Պոդոլսկը, Լվովը, Լուցկը, մասսամբ նաեւ Եազովեցը՝ թէեւ այս գաղթօջախի սկզբնաւորման հաւաստի փաստը համարում է տեղի հայերին շնորհուած եան Ռազիկի 1615 թ. արտօնագիրը¹: Սատանուվը, Կրակովը եւ Բարը նա համարում է ԺԵ-ԺԶ. դարերի գաղթավայրեր, Պոդհայցէն, Տըսմենիցը, Զամոշչիէն՝ ԺԶ., Լուբլինը եւ Եարոսլավը՝ ԺԶ-ԺԷ. դարերի գաղթօջախներ։ Գաղթավայրերի մեծ մասը Բարոնչի կարծիքով հիմնուել է ԺԷ. դարում (Ժուանեց, Ժուլիուս, Վարշաւա, Վարենժ, Զոլոչեւ, Ստուրենիցա, Ստանիսլաւ, Շնեատին, Լիսեց, Կազիմեժ-Շոլնի, Բերեժանի, Բարեկ): Մնացածների (Բալթա, Զէրնովցի, Դուբնօ, Հորոդենկա, Ռաշքով, Կուտի, Մոգիլեւ-Պոդոլսկ, Օբերտըն, Ժուկով) ճեւաւորումը դնում է ԺԼ. դարը։

Հստ Բարոնչի, ինչպէս ասուեց, Ռեչ-Պոսպոլիտա մտած ամենաառաջին հայ գաղթականների հանգրուանը Կամենեց-Պոդոլսկի մօտերքում գտնուած Օրմիանէ եւ Օրմիանկի գիւղերն են, որոնց կողքին 1062 թ. հիմնուեց Կամենեց-Պոդոլսկը։ Բարոնչի կարծիքով հայերն այս գիւղերը հիմնել են ԺԳ. դարում (Ռըս ջեյուվ, էջ 163): Մ. Բալինսկին եւ Տ. Լիպինսկին եւս այս գիւղերը ԺԳ. դ. հիմնուած գաղթավայրեր են համարում, որտեղից հայերը շարժուել են դէպի Լեհաստանի միւս բնակավայրերը։ Տ. Կրուսինսկին նշուած գաղթօջախներն աւելի հին է համարում՝ նշելով որ հայերն այստեղ են եկել 1062 թ. յետոյ։

1. S. BARACZ, *Rys dziejów ormiańskich (այսուհետեւ՝ Ս. ԲԱՐԱՆՉ, Ռըս ջեյուվ օրմիանսկիսին), Tarnopol, 1869, էջ 89:*

Կամենեց-Պոդոլսկի մասին խօսելիս Բարոնչը նախ բերում է բանաւոր մի աւանդութիւն, ըստ որի 1250 թ. այստեղ հայոց եկեղեցի է եղել, ուր պահուել է Անիից բերուած Ղուկաս Շաղկողի Ս. Մարիամ Աստուածածնի պատկերը²: Բայց հայերի մուտքն այստեղ ընդունում է ԺԴ. զարը՝ վկայակոչելով տեղի եկեղեցում իր տեսած ձեռագիր մի ծիսարանի յիշատակարանը, որի նախավերջին՝ մագաղաթեայ էջում, գրուած է. «Ս. Նիկոլայ եկեղեցուն տրուած այս ծիսարանը... գրուած է հայոց թուականութեան 798 թ., իսկ Քրիստոսի թուարկութեան 1349 թ., Ղրիմի Սուրբսաթ քաղաքում, Ստեփանոս քահանայի ձեռամբ: Գրուելուց 45 տարի յետոյ (1349 թ. Լ. Հ.) Կուտալբէյի որդի Սինանը գնեց այս ու նուիրեց յիշեալ Ս. Նիկոլայ եկեղեցուն՝ հայոց թուականութեան 847 եւ Քրիստոսի թուարկութեան 1398 թ. օգոստոսի 15ին: Այդ նոյն Սինանը սեփական ծախսով կանգնեց Ս. Նիկոլայի այս եկեղեցին՝ հայոց թուականութեան 847, իսկ Քրիստոսի թուականութեան 1394 թուին³: Յետագայ ուսումնասիրողներն ու արդի պատմաբանները եւս Կամենեց-Պոդոլսկի Ս. Նիկողայոսի եկեղեցու կառուցումը դնում են 1398 թ.:

Կամենեց-Պոդոլսկի հայոց իրաւունքի մասին բարոնչը նշում է, որ նրանք սեփական իրաւունքով շարժուելու արտօնութիւններ ունէին դեռեւս Պողովիայի իշխաններից ու Վաղդիսլաւ Եազիէլլոյից (Լիտուական Մեծ իշխան՝ 1377 թ.ից, լեհական թագաւոր՝ 1386-1434 թթ.), որը «վերահաստատեցին Վլադիսլաւ Վարնենչիկը եւ նրա տեղապահ, Կամենեցի Կաշտելան եւ ստարոստա նան զ Զըժովա), 1443 թ.»: Հայոց աղքիւրներից մեզ հասած տեղեկութեան համաձայն, Կամենեցի հայերը 1350 թ. «Սկսան ի ձեռն բրիվիլեկաց թագաւորացն լեհաց զբատարանս առնել. մինչեւ զի կարող եղեն զմահապարտս մեռուցանել, առանց հրամանի կամ թոյլտուութեան լեհաց»⁴: Ստ. Ագոնցը գրում է թէ Կեմենեցի հայերը Կազիմիրը մեծից արտօնագիր ստացան 1344 թ.⁵: Հատ Բարոնչի, Կամենեցի հայերի ինքնուրոյնութիւնը վերացաւ 1790 թ. Փետրուարի 3ից յետոյ, երբ քաղաքի բոլոր երեք իրաւադրութիւնները (հայ-

2. S. BARACZ, *Cudowny obraz Matki Najświętszej w Polsce*, § 103:

3. Ս. ԲԱՐՈՆՅԱ, Ռև շեյուվ օրմիանսկին, էջ 92:

4. ՍՏ. ՌՈՇՔԱՅ, Ժամանակագրութիւն կամ տարեգիրք տարեկան եկեղեցակամք, Հրատարակեց Հայր Յ. Ռակիան, Վենետիկ, 1984, էջ 149-150:

5. ՍՏ. ԱԳՈՆՑ, Աշխարհագրութիւն չորից մասամց աշխարհի, մասն երկորդ, հտ. թ., Վենետիկ, 1802, էջ 94:

կական, լեհական եւ ուկրայինական) միացան մէկ ընդհանուրի մէջ⁶:

Բնակչութեան թուրի մասին պատմաբանը գրում է. «Ասում են 1566 թ. հայերն այստեղ 900 տուն ունէին եւ իրենց Գրիգոր վարդապետ անուն եպիսկոպոսը» (Խըս ջեյուվ, էջ 94): Դիւանական փաստաթղթերից քաղած Մ. Ռոլլէի տուեալներով, ժԶ. դարակէսին Կամենեցում 1200 ընտանիք հայ կար, որոնք ապրում էին 900 տների մէջ⁷: Ըստ Ա. Պիդուի, 1600ական թթ. Կամենեցում հայոց չորս եկեղեցի կար, իսկ քաղաքից գուրս՝ եւս չորս կամ հինգ եկեղեցի, որոնցից միայն երկուսն էին հայերին, մնացածը անցել էր լատինացիներին, որովհետեւ հայերը լքել էին⁸: ԺԷ. դարավերջին Ստ. Ագոնցը Կամենիցի մասին գրում է, թէ լեհերը 40 գերդաստան էին, ոռւաները՝ 150, իսկ հայերը աւելի քան 110 գերդաստան (նշ. աշխ., մասն երկրորդ, հտ. Բ, էջ 145):

Ուսումնասիրողների մի մասը (Մ. Բալինսկի եւ Պ. Լիպինսկի, Մ. Դորոնովիչ, Տ. Գրոմնիցկի, Ա. Լոլլէ, Լ. Լոզինսկի, նորերից՝ Մ. Զակիեւսկա-Դուբասովա եւ ուրիշներ) Կամենեցի հայոց գաղութի սկիզբը դնում են ժԳ. դարը: Օրինակ Ա. Ռոլլէն նշում է որ 1240-1373 թթ. վաւերագրերում Կամենեցը կոչում էր «Թաթարա-հայկական քաղաք»⁹: Զ. Լեխիցկին այդ առիթով հետեւեալն է գրում. «Դեռեւս ժԳ. դարակէսին հայերն այստեղ այնպիսի նշանակալի թիւ էին կազմում, որ քաղաքի պատմութեան մի ամբողջ երկար շրջան (1240-1373) կոչուել է թաթարա-հայկական: Նրանց եւ թաթարներին այստեղ է հրաւիրել Հալիչի իշխան Լեւ Դանիլովիչը, 1280 թ.: Եւ հէնց մօտաւորապէս այդ ժամանակ էլ... հիմնուել է Կամենեցի առեւտրա-վաճառականական հայ գաղթավայրը եւ Ս. Մարիամ Աստուածածին անուն եկեղեցին»¹⁰: Վլ. Լոզինսկու կարծիքով, հայերն այստեղ 1250 թուին եկեղեցի ունէին, իսկ ժԶ. դարում՝ հայոց դպրոց ու եպիսկոպոս¹¹: Այսպիսով անվարան կարելի է պնդել, որ հայերը Կամենեցի եթէ ոչ հիմնադիրները, ապա առնուազն քաղաքը

6. S. BARACZ, *Pamiętnik drzejow Polski*, Lwow, 1855, էջ 197:
7. M. ROLLE, *Z życia ormian kamieneckich w XVIII wieku*, «Z minionych stuleci» ժողովածոյի էջ, Lwow, 1908, էջ 192:
8. Բոմի միուրիւմ հայոց Լիհաստանի լմդ եկեղեցւոյն Հոռվմայ, էջ 12-13:
9. DR. ANTONI, *Nowe Opowiadania historyczne*, երկրորդ հրատ., Lwow, 1883, էջ 125:
10. CZ. LECHICKI, *Kosciol Ormian W Polsce*, Lwow, 1925, էջ 35:
11. Հայրենիք (ամսագիր), Բոստոն, 1929, թիւ 5, էջ 82:

զարգացնող-ճոխացնող տարրերից էին բնակավայրը հիմնելու ժամանակներից:

Լուցկի հայերի մասին ամենավաղ յիշատակութիւնը Բարոնչը վերագրում է ԺԴ. դարավերջին: Մօտ 1390 թ., գրում է նա, դոմինիկեաններն այստեղ եռանդուն քարոզչական գործունէութիւն են ծաւալել «ուկրայինացիներին, հայերին եւ այլ հերձուածողներին դարձի բերելու համար»¹²: «Ակնարկ հայոց պատմութեան» գրքում նա Լուցկի մասին հետեւեալն է գրում. «Հաւանաբար այստեղ շատ վաղուցուանից էին հայեր ապրում, երբ 1492 թ. Յունուարի 22ին իրենց եպիսկոպոսի գլխաւորութեամբ ողջունեցին Սիգիզմունդ կայսրին, Վլադիսլավ Լադիկլոյ թագաւորին եւ լեհական թագաւորութեան կարեւոր գործերի վերաբերեալ բանակցութիւններ վարելու համար այստեղ ժամանած միւս իշխաններին» (Խըս ջեյուվ, էջ 152): Զախարիասեւիչի կարծիքով հայերը Լուցկ են մտել Կիեվից¹³: Լուցկը լեհահայ հնագոյն գաղթավայրերից են համարում նաեւ Տ. Գրոմնիցկին, Վլ. Լոզինսկին եւ ուրիշներ¹⁴: Լեհ արքի պատմագիտութիւնը ապացուցուած է համարում որ Լուցկի հայերը իրենց Ս. Ստեփանոս հին եկեղեցին հիմնովին վերակառուցել են 1377 կամ 1378 թուին¹⁵:

ԺԴ. դարակէսին Լուցկը հայաշատ գաղթավայր լինելու մասին բազմաթիւ վաւերական փաստաթիթեր կան հայկական աղբիւրներում: Այս տեսակէտից առանձնապէս կարեւոր են Մեսրոպ Ա. Արտազեցի կաթողիկոսի (1359-1372 թթ.) 1364 թ. եւ Թաղէոս կաթողիկոսի (1382-1392 թթ.) 1384 թ. Կոնդակները լեհահայութեանը Գրիգոր Ա. եպիսկոպոսին լեհահայ թեմի առաջնորդ նշանակելու եւ Յովհաննէս եպիսկոպոսի թեմակալութիւնը վերահաստատելու մասին: Կոնդակի մէջ, որպէս վիճակաւոր քաղաքներ, Լվովից ու Վլադիմիրից յետոյ, նշուած է Լուցկը¹⁶: Խսկ Մեսրոպ Արտազեցու 1364 թ. կոնդակի այն հատուածը, որտեղ նա գրում է թէ իր նշանակած թեմակալից առաջ այդ վայրերում առանց իր գիտութեան գործում էին այդ

12. S. BARACZ, *Rys dziejow kaznodziejskiego w Polsce*, t. 2, Lwow, 1861, էջ 315:
13. FR. ZACHARYASIEWICZ, *Wiadomości o Ormianach w Polszcze*, Lwow, 1842, էջ 8:
14. T. GROMNICKI, *Ormianie w Polsce*, Encyklopedia kościelna, t. 17, էջ 440-441; Հայրենիք, 1929, թիւ 5, էջ 82:
15. K. STOPKA, *Kosciol Ormianski na Rusi, տե՛ս՝ «Nasza przeszlosc»* (Studia z dziejów Kościoła i kultury katolickiej w Polsce), t. 62, Krakow, 1984, էջ 52:
16. Կամինց տարեգիրք հայոց Լեհաստամի, կազմեց Դ. Ալիշան, Վենետիկ, 1895, էջ 5, 217:

թեմի եպիսկոպոսներ («Իսկ այնոքիկ որ մինչեւ ցայժմ կային առ ձեզ՝ առանց մերոյ աթոռոյս հրամանի, ոչ էին ուղղակի, այլ վարձկանք»¹⁷), ցոյց է տալիս, որ Լուցկում կարող էին հայեր ապրած լինել ժդ. դարի վերջերից, քանի որ եպիսկոպոսի նստավայր եւ թեմի վիճակ յայտարարելու համար քաղաքը պէտք է ոչ միայն հայաշատ լինէր, այլեւ շրջակայքի հայոց եկեղեցական կեղրոնը:

Լվովի մասին Բարոնչը հետեւեալն է գրում. «Հայերի այստեղ գալու ժամանակը դժուար է որոշել: Բանաւոր աւանդութեամբ* հայերն այստեղ 1183 թ. փայտաշէն եկեղեցի են ունեցել: Ենդժէյ Կոհերը պնդում է, որ նրանց այստեղ է բերել Լեւոն իշխանի հայր Դանիէլը: Նիեսիցկին էլ ասում է թէ մօտ 1200 թ. Փրանցիսկեանները նրանց են զիջել Ս. Վալենտի անունով իրենց մատուռը... Բայց այդ ժամանակ աշխարհում Փրանցիսկեաններ չկային: Եան Ալնպեխը հաղորդում է, որ հայերը մօտ 1280 թ. են այստեղ հիմնուել ուսւական իշխանների խնամակալութեան տակ: Հաւանաբար հնագոյն ժամանակներից այստեղ հայեր կային «եպրակացնում է Բարոնչը»¹⁸: Նա հաւատ է ընծայում լեհական ու հին ուսւական աղքիւրներից քաղած այն տեղեկութեանը, թէ երբ լիտուական զօրքերը 1327 թ. պաշարել էին Լվովը, «հայերը Լվովի պաշտպանութիւնում հրաշքներ են գործել»¹⁹: Ընդունելով որ Լվովի հայոց գաղութը ստեղծուել է քաղաքի հիմնարկութեան ժամանակ, այսուամենայնիւ նա գաղթօջախի սկզբնաւորման հաւաստի փաստարկներ է համարում լվովահայերին տուած Կաղիմիր Մեծի 1356, 1367 թթ. Հրովարտակներն ու ցայսօր կանգուն հայոց եկեղեցու հիմնարկութիւնը (1363 թ.): Ստ. Ագոնցն այս առիթով գրում է. «Որպէս պատմէ Ստեփանոս վարդապետ Խոշքայ, առեալ ի ստուգագիր պատմագրէ ուղումն ի յիսուսեան կարգէ (Բարոնչից մեր մէջբերած հատուածից երեւում է, որ դա Կ. Նեսեցկին էր: Ռ.Հ.), հայք ի սկզբանէ անդ չունելով առանձին եկեղեցի, կատարէին զաստուածային պաշտամունս ի մատրան սրբոյն Վալենտիոսի շնորհեալ նոցա առ ժամանակ մի ի Փրանչիսկեանց, որ ցայսօր կոչի Մատուռն Հայոց: Ընդ այն ժամանակս՝ կամ փոքր մի զկնի՝ կատարէին զպաշտումս իւրեանց եւ եկեղեցւոջ Մարիամու Մագ-

17. Անդ, էջ 6:

* Դա ոչ թէ «բանաւոր աւանդութիւն» էր, այլ այդ եկեղեցու յիշատակարանում նշուած գրաւոր փաստաթուղթ, տե՛ս յաշորդ յղումները:

18. Ս. ԲԱՐՈՆՉ, Ռու ջեյուվ, էջ 104:

19. Անդ:

դաղենացւոյ գոմինիկեանց . զոր բաց աւանդէ՝ ցուցանեն եւ գերեզմանք հայոց հայկական գրուածովք, եւ պատարագի զգեստք ըստ ծիսի հայոց ի վաղընջական ոսկեթել դիպակաց, որք տեսանին անդ մինչեւ ցայժմ: Ապա ի 1183 (ընդգծ. իմը: Ռ.Հ.) շինեցին առանձին եկեղեցի քարակերտ, որով վարեցան ըստ ասելոյն նորին Ստեփանոսի վարդապետի ամս 180, զի 1363 ի նմին տեղւոյ կառուցին քարաշէն եկեղեցին, որ՝ կայ մինչեւ ցայսօր . գլխաւոր բարերարք շինութեան եկեղեցւոյ եղեն Յակոբ որդի Շահնշահի կաֆայեցի . եւ Փանոս որդի Աւրանի զաղացի . զորոց զմուրհակ կամ կոտակագիր որ վասն շինութեան այսր եկեղեցւոյ, ի դէպ համարիմք աստանօր յառաջ բերել . ընդ օրինակեալ ըստ տառից ի բուն նախատիպ մագաղաթեայ պատճէնէ անտի²⁰»: Ապա բերում է վաւերագիրը:

Վկայակոչելով 1183 թ. Լվովում հայոց փայտաշէն եկեղեցու գոյութիւնը նշող ձեռագիր մի յիշատակարանից քաղած տուեալը՝ Մ. Բժշկեանը, Ղ. Ինձիճեանը, Ա. Ալթունեանը եւ ուրիշներ, նշում են որ Լվովում Ժ. դ. հայաշատ գաղթօջախ է եղել²¹: Մ. Բժշկեանը մէջբերում է Հաճկատար եկեղեցու Յիշատակարանը, որտեղ գրուած է . «Աթոռանիստ եկեղեցին Հայոց ի Լվովայ շինեցաւ յամի Տեառն 1183 թ. փայտաշէն . իսկ 1363 թ. շինեցին քարաշէն»²²: Լեհահայ պատմաբան Ֆր. Զախարիասեւիչի վկայութեամբ՝ Վիեննայի Միխթարեան Միաբանութեան Աբբահայր, Աստուածաշնչի հայերէն լաւագոյն հրատարակութիւններից մէկի հեղինակ Յովհաննէս Զոհրապեանը 1791 թ. Լվովում տեսել է 1130, 1183, 1148, 1200 եւ 12445 թթ. Հայատու տապանաքարեր²³: Սակայն Ֆր. Զախարիասեւիչը, ընդունելով Լվով բերդաքաղաքը Լեւոն Դանիլովիչ իշխանի կողմից հիմնադրելուց առաջ այստեղ հայ բնակչութիւն լինելու հաւանականութիւնը, այսուամենայնիւ կասկած է յայտնում Յովհ. Զոհրապեանի տուեալների հանդէպ՝ ենթադրելով թէ իբր Յովհ. Զոհրապեանը, այդ հմուտ հայկաբան-պատմաբանն ու աստուածաբանը, Քրիստոսի թուականը շփոթել է հայոց Մեծ թուականութեան հետ: Զախարիասեւիչի այս միամիտ կասկածը հիմք ընդունելով, ուկրային որոշ պատմաբաններ յիշեալ տապանա-

20. Ա. Գիւլիկը ԱԳՈՆՑ, Աշխարհագրութիւն չորից մասանց աշխարհի, մասն երկրորդ, հու. Բ., էջ 132-133:
21. Ղ. Ինձիճեան, Հնախօսութիւն Հայաստամեայց, հու. 1, Վենեսիկ, 1835, էջ 343; Ա. Ալթունեան, Տեղեկագրութիւն որք ի Մօլոս-Վալախիա, Հունգարիա եւ ի Լեհաստան, Ֆօքչան, 1877, էջ 122 եւայլն:
22. Մ. Բժշկեան, Ճանապարհորդութիւն ի Լեհաստան..., էջ 104:
23. Ֆր. Զախարիասեն, նշուած աշխ., էջ 17:

քարերի մասին տեղեկութիւնը անհիմն են համարել։ Մինչդեռ Միխիթարեան պատմաբանի տուեալները հաստատող տեղեկութիւն է բերում Ստ. Ռոշքան։ Նա 1730ական թուերին Լվովում հայոց թուականութեան մի տապանաքար է տեսել, որը համապատասխանում է Յուլեան տոմարի 1277 թուականին²⁴։ Ստ. Ագոնցից վերը մէջքերեալ հատուածում տեսանք, որ 1790ական թուականների վերջին Լվովում հայոց տապանաքարեր է տեսել նաեւ Ստ. Ագոնցը, որը ցաւօք չի բերել ո՛չ այդ տապանաքարերի վերծանութիւնը, ոչ էլ թուականը (տե՛ս Ստ. Ագոնց, Աշխարհագրութիւն, մասն երկրորդ, հտ. Բ., էջ 132)։ Լվովի Պող-զամչէ կոչուող հայկական արուարձանում 1183 թ. Ս. Աննա կոչուող փայտակերտ եկեղեցի լինելու հայկական եւ հին ուռւական աղբիւրների տեղեկութիւններին հաւատ են ընծայել նաեւ լեհ գիտնականներ Ա. Ռուլէն, Զ. Օբերտընսկին, Զ. Լեխիցկին եւ ուրիշներ։ Վերջինս նշում է որ 1363 թ. կառուցուած Հանգատար քարաշէն եկեղեցու տեղում 1240 թ. կանգուն է եղել փայտաշէն ուրիշ եկեղեցի²⁵։

Այսպիսով, հայերը կարող են անկասկած դիտուել Լվով քաղաքի հիմնադիրները, յետագայում, Լեհ Դանիլովիչի կողմից Լվովի բերդը կառուցող շինարարներից, իսկ բերդաքաղաքը հիմնադրելուց յետոյ՝ այդ քաղաքը շինացող հիմնական տարրը։ Սա մենք պնդում ենք, քանի որ այդ քաղաքում հայերի բնակութեան մասին տուեալները մօտ 100 տարի աւելի հին են, քան Լվովի բերդի հիմնարկութիւնը Դանիէլ Ռոմանովիչի կամ նրա որդի Լեհ Դանիլովիչի կողմից^{*}։ Հստ Բարոնչի, եթէ 1600 թ. Լվովում 1000 տուն հայ էր ապրում, ապա 1784 թ. նրանց թիւը շեշտակի նուազելով՝ հասել էր ընդամէնը 212 հոգու (Խըս

24. ՍՏ. ՌՈՇՔԱՅՑ, Ժամանակագրութիւն կամ տարեգիրք..., էջ 126։

25. CZ. LECHICKI, Kościół Ormiański w Polsce, էջ 33։

* ժշ-ժէ. դդ. ժամանակագիրներ Գրունեվէզը, Կրոմերը, Ալնակիրը, Զիմորովիչը, Լվովի հիմնադիր են համարում Լեհ Դանիլովիչին (իշխել է 1264-1301 թթ.), իսկ Գալիցիո-Վոլինեան տարեգրութիւնները նշում են, թէ Լվովը 1250 թուին հիմնել է Լեռնի հայր Դանիլը։ ԺԼ. Դարի 80ական թուականներին Լվովի պարիսպներից մէկի մէջ գտնուած մի քարի վրայ լատիներէն գրուած էր. «Լեռն դուքսն է իմ հիմքը դրել, եւ յետնորդները ինձ տուեցիմ Լեռպոլիս անուե» (Մ. Բժշկեան, Ճանապարհորդութիւն ի Լեհաստան..., էջ 95; Իсторія Львіва, Київ, 1984, էջ 15)։ Ուկրային արդի պատմագիտութեան մէջ ընդունուած տեսակէտի համաձայն, Լվովի մասին առաջին տեղեկութիւնը վերաբերում է 1258 թուին։ Լեհ եւ ուկրային պատմագիտութիւնը ճշտուած է համարում, որ Լվովը հիմնել է կամ Դանիլը կամ նրա որդի Լելը՝ 1250 թուին։ Տե՛ս, Słownik historii Polski, Warszawa, 1973, էջ 232; Իсторія Львіва, Київ, 1984, էջ 14։

ջեյուվ, էջ 191): Ստ. Ագոնցը ժիշտ դարավերջին լվովահայերի մասին գրում է. «Բայց հայք սակաւ են, զի թիւ նոցա հազիւ ժամանէ 126 ուր երկերիւր ամօք յառաջ էին գերդաստանք 700 եւ աւելի» (նշ. աշխ., էջ 131): Բ. Եանուշի ստոյգ տուեալները, որ նա քաղել է դիւանական փաստաթղթերից, բաւական մօտ են 1784 թ. համար բարոնչի յայտնած տուեալներին: Բ. Եանուշը գրում է, որ լվովահայերը 1648 թ. 147 տուն ունէին, 1654 թ.՝ 73 տուն, 1704 թ.՝ դարձեալ 73 տուն, իսկ 1711 թ.՝ 72 տուն²⁸: Դ. Զուբր-ըիցկու տուեալներով՝ ժիշտ. դ. սկզբին Լվովում ապրում էր 63 տուն հայ ընտանիք²⁹: 1820 թ. Մ. Բժշկեանը Լվովի բնակչութեան մասին գրում է. «Այժմեան ժողովուրդք ի Լվովայ ըստ մեծի մասին են հրեայք, որք յիշատակեալ են զվաճառականութիւնս հայոց»³⁰: Ա. Ալթունեանը 1876 թ. Լվովում ընդամէնը 20 ընտանիք հայ է տեսել³¹:

Եազլովեցի մասին Բարոնչը Հաղորդում է, թէ ըստ բանաւոր աւանդութեան, հայերն այսուել 1250 թ. եկեղեցի են ունեցել, որը հիմնել են Ղրիմից եկած հայերը, իսկ մէկ այլ աւանդութեամբ մի ժամանակ այս քաղաքը եղել է եպիսկոպոսի նստավայր (Ռըս ջեյուվ, էջ 88): Բարոնչի յիշած բանաւոր աւանդութիւնը Եազլովեցի առումով եւս գրաւոր հիմք ունի: Մ. Բժշկեանը, Եազլովեց եղած ատեն կարդացել է 1645 թ. մի յիշատակարան, ուր նշուած էր, որ այդ թուին Եազլովեցի առաջնորդն էր Անդրէաս Արքաս. ը: Նոյն էջում Բարոնչը շարունակում է. «Ծերք պատմեցին մեզ աւանդութեամբ, թէ Քէֆեցի հայք յօպմիանի դաշտէն աստ եկեալ բնակեցան...»: Այնուհետեւ նշուած է, թէ Յիշատակարանը գրուել է «ի վոյթութեան բան (պան. Ռ. Հ.) Պաղպասարին եւ երկոտասան դատաւորացն»³²: Եազլովեցի Անդրէաս եպիսկոպոսի մասին մի ամբողջ աշխատութիւն է գրել ԺԹ. դարի լեհ պատմաբան Զ. Օբերտընսկին³³: Ֆր. Սիհարչինսկին 1250 թ. Եազլովեցում հայոց եկեղեցու գոյութեան մասին տեղեկութեանը չհաւատալով, հաւատ է ընծայում մի այլ աւանդութեան, ըստ որի Եազլովեցը ժիշտ. դարում հիմնել են հայերը³⁴: Զ. Օբերտընսկին գրում է թէ

26. B. JANUSZ, *Mons pius Ormian Iwowskich*, Lwow, 1928, էջ 13:
27. D. Zubrycki, *Kronika miasta Lwowa*, Lwow, 1844, էջ 69:
28. Մ. Բժշկեան, Ճամապարհորդութիւն ի Լեհաստան..., էջ 96:
29. Ա. Ալթունեան, Տեղեկագրութիւն հայոց գաղթականութեան..., էջ 123:
30. Մ. Բժշկեան, Ճամապարհորդութիւն ի Լեհաստան..., էջ 130:
31. Զ. ՕԲԵՐՏԸՆԸԿԻՆ, Լեհահայերը եւ անոնց Անդրէաս եպիսկոպոսը Եազլովեցի մէջ, Ճամդէս ամսօրեայ, 1962, թիւ 9-12:
32. Հմմտ. Վ. Գրիգորյան, *История армянских колоний Украины и Польши*, Ереван, 1980, էջ 100:

քաղաքի բնակիչների 1530-1541 թթ. անուանացանկերում հայեր չեն նշուած, իսկ տեղի հայոց եկեղեցին ժամապերջի կնիք ունի, հետեւարար հայերն այս քաղաք են մտել ժամապերջի կէսից ոչ չուտ³³: Լ. Կորուփինը, Մ. Զակժեւսկա-Դուբասովան, Վ. Գրիգորեանը եւ ուղիներ Եազլովեցի հայոց գաղութի սկզբնաւորումը համարում են ժե. դարը³⁴:

Բարոնչը այնուհետեւ գրում է, թէ մօտ 1643 թ. հայերն այստեղ ունէին 12 դատաւորներից բաղկացած դատարան, որը վերացուեց 1700 թ. (Խըս Ջեյուկ, էջ 90): Բարոնչը համապատասխան կոռուաններ չունենալով, գաղութի սկզբնաւորման անվիճելի փաստարկը համարում է Եազլովեցի հայերին տուած Ռաջիւլի 1615 թ. արտօնագիրը եւ գաղութի սկզբնաւորումը առնուազն 150 տարով ետ է բերում: Ի նկատի ունենալով որ Եազլովեցում ժե. դ գոյութիւն է ունեցել հայոց դատարան, վոյթ եւ եպիսկոպոս-առաջնորդ, հաւատ ընծայելով այստեղ 1250 թ. փայտաշէն եկեղեցի լինելու բանաւոր աւանդութեանը, կարծում ենք Եազլովեցի հայոց գաղթավայրը նոյնքան հին է, որքան Լվովինը:

Սնեատինի հայոց գաղութի սկզբնաւորման համար իբրև անառարկելի փաստ, Բարոնչը ընդունում է Սիգիզմունդ Գ.ի 1628 թ. արտօնագիրը*, որով տեղի հայերին թոյլատրում էր բնակուել քաղաքում, հիմնել եկեղեցի, զաղուել արհեստներով ու առեւտրով, ունենալ սեփական ինքնավարական մարմին եւ առաջնորդուել այն դատաստանագրքով, որը գործածում էին Լվովի եւ Կամենեցի հայ համայնքները³⁵: Սնեատինը ժե. դ. գաղութ է համարում նաեւ Մ. Զակժեւսկա-Դուբասովան (տե՛ս նշ. աշխ., էջ 22), մինչդեռ Մ. Բժշկեանը գրում է, որ 1820 թ. այդ քաղաքի մեծահասակներից լսել է, թէ ղեռեւս 300 տարի առաջ (1520 թ.) այստեղ հայերը փայտաշէն եկեղեցի ունէին³⁶: Բժշկեանի լսած բանաւոր աւանդութեան օգտին է Ե. Հելենիուշի մի վկայութիւնը, որ ժե. դ. Սնեատինում հայ վաճառական-

33. Զ. ՕԲԵՐՏԸԸՆՍԿԻ, նշ. աշխատութիւնը, Հանդէս ամսօրեայ, 1962, թիւ 9-12, էջ 463, 468:
34. L. KORWIN, *Ormianskie rody szlacheckie*, Krakow, 1934, էջ 28; Վ. Գրիգորեան, նշ. աշխ., էջ 101:
- * Արտօնագրի բնագիրն այժմ պահւում է Լվովի պետական կեդրոնական դիւնուլ/ЦГИИА України во Львове, фонд 52, опис 3/47-54, էջ 103-109:
35. S. BARACZ, *Zywoty ks. S. Stefanowicza arcybiskupa Lwowskiego Ormianskiego*, Dodatek tygodniowy przy Gazecie Lwowskiej, Lwow, 1859, թիւ 29, էջ 123:
36. Մ. Բժշկեան, ձանապարհորդութիւն ի Լեհաստան..., էջ 125:

ները արեւելք-արեւմուտք կապերի մէջ միջնորդի գեր էին կատարում³⁷: Լ. Կորուկնը Սնեատինի հայոց գաղթավայրի սկիզբը աւելի ետ է տանում՝ նշելով որ հայերն այսուեղ բնակւում էին ԺԵ. դ. առաջ (տե՛ս Լ. Կորուկն, նշ. աշխ., էջ 28): Հիմնուելով 1589 թ. պատմական վաւերագրերից մէկում պահպանուած այն տեղեկութեան վրայ, ըստ որի, երբ թաթարներն այդ թուին յարձակուեցին Սնեատինի վրայ, գերեալների մէջ բազմաթիւ հայեր կային, ուկրայինացի պատմաբան Վ. Գրաբովեցկին Սնեատինի հայոց գաղութի հիմնարկութեան ժամանակը համրում է ԺԶ. դարը:

Բարոնչը նշում է հայերը 1728 թ. այսուեղ 484 հոգի էին, իսկ 1860 թ.՝ մօտ 300 (Ռըս ջեյուվ, էջ 165, 167): Ստ. Ագոնցը 1791 թ. Սնեատինում 547 հայ է հաշուել, իսկ 1800 թ.՝ 50 ընտանիք³⁸: Դիւանական փաստաթղթերը սակայն ցոյց են տալիս, որ 1752 թ. Սնեատինում 54 ընտանիք հայ կար, իսկ 1860 թ.՝ 135 հոգի³⁹: Մ. Բժշկեանը 1820 թ. այսուեղ 70 տուն հայ է հաշուել, որոնք յստակ խօսում էին հայերէն, իսկ ծերերից շատերը ոքրիչ լեզու չգիտէին⁴⁰: Ա. Ալթունեանը գրում է. «Երկու եկեղեցի շինած են հայք, որոնցից մէկը, հայերից լքուած լինելու պատճառով, լեհերը գրաւած են այսօր, 40 տուն հայ կայ, որոնցից շատերը փոքր ի շատէ գլուխն հայերէն, բայց անոնք, որ 50 տարեկան են: Երիտասարդք ամենեւին չգիտեն»⁴¹:

Այսպիսով՝ Սնեատինի հայերի մասին եղած տուեալների մեծ մասը մեզ թոյլ է տալիս եզրակացնել, որ գաղութը հիմնուել է առնուազն ԺԶ. դարում:

Ստանիսլավի հայոց գաղթօջախին Բարոնչը անդրադարձել էր դեռեւ 1858 թ. հրատարակուած իր «Ստանիսլավ քաղաքի յուշարձանները» մենագրութեան մէջ, որտեղ գրում է թէ քաղաքի հիմնադիր Ստ. Պոտոցկին մօտ 1662 թ. հրեաներին եւ Սոլդատիայից հրաւիրած հայերին դաւանանքի ազատութիւն է տալիս, թոյլատրում է առաջնորդուել իրենց օրէնքներով, զբաղուել առեւտրով ու արհեստներով⁴²: Նոյն գրքի 30-34 էջերում նա զետեղել է նաեւ յիշեալ արտօնագիրը, իսկ «Ակնարկ հայոց

37. E. HELENIUSZ, *Rozmowy o Polskiej Koronie*, Krakow, 1876, էջ 478-480:

38. US. Գիհվէր ԱԳՈՒ8, նշ. աշխ., մաս 2, էջ 142:

39. Библиотека АН Украины во Львове, отдел рукописей, фонд Осолинских, N. 2825/2, էջ 2-6 (հմմտ. Վ. Գրաբովեցկու նշ. յօդուածը, ԽՍԴ - 1965, էջ 144):

40. Մ. Բժշկեան, Ճամապարհորդութիւն ի Լեհաստան..., էջ 125:

41. Ա. ԱԼԹՈՒՆԵԱՆ, Տեղեկագրութիւն հայոց գաղթականութեան..., էջ 134:

42. S. BARACZ, *Pamiątki miasta Stanisławowa*, Lwow, 1858, էջ 12-13:

պատմութեան» գրքում գրում է, թէ Պոտոցկին հայերի համար կառուցել է տալիս եկեղեցի, 1677 թ. Հրովարտակով նրանց թոյլատրում է 12 հոգուց բաղկացած դատարանով ու վոյթով սեփական իրաւադը ու թիւն բանեցնեն. այնուհետեւ նշում է որ Կամենեցը թուրքերին անցնելուց յետոյ Ստանիսլավի հայութիւնը համալրում է այնտեղից փախստական հայերով (Ռըս ջեյուվ, էջ 167): Վլ. Լոգինսկին եւս պնդում է, որ Ստանիսլաւում հայերը բնակւում էին քաղաքի հիմնադրման օրուանից (Հայրենիք, 1929, թիւ 5, էջ 82): Ստ. Ագոնցը այս քաղաքի մասին գրում է. «Թիւ բնակչացն հասանէ ց3500. յորոց 415 են յաղգէ մերմէ բովանդակեալ ի 70 գերդաստանս... Հիմնարկութիւն քաղաքիս եղեւ ի 1670 ի Ստանիսլաւոս լեհ իշխանէ... զոր յիւր անուն անուանեալ, պատրաստեաց ի բնակութիւն վաճառականաց հայոց ազգին. զորս հրաւիրեալ էր ըստ մասին ի Սոլտաւիոյ, եւ ըստ մասին ի Մաճառաց, շինելով նոցա եւ եկեղեցի իւրով ծախիւք. այլ 1741 հայք հիմն արկին նոր եկեղեցւոյ քրտնաշան խնամատարութեամբ աւագերիցու տեառն Յակոբ Վարդերեսովիչ սրբակրօն քահանայի, որ կատարեցաւ ի 1751. որ եւ է մեծաշէն եւ գեղեցիկ քան զամենայն եկեղեցիս հայոց կառուցեալ ի լեհ, առ որով է եւ բնակարան աւագերիցուն, որ ըստ սովորութեան երկրին անուանի օֆիցիալ, զի է ընդհանուր փոխանորդ արքեպիսկոպոսին հայոց ի բոքուցիս դաւարի» (Աշխարհագրութիւն..., էջ 140): Այսպիսով, Ստանիսլաւը Ռեչ-Պոսպոլիտայի այն քաղաքներից է, որը հիմնելու եւ մասնաւանդ ճոխացնելու մէջ հայերը վճռական դեր են ունեցել: Իրօք, քաղաքի հիմնադրի Պոտոցկու հայանպաստ-հայասէր կեցուածքը նախ եւ առաջ թելադրուած էր քաղաքը կառուցող-չէնացնող տարրով բնակեցնելու նրա դիտաւորութեամբ: Ընդ որում նրա այդ դիտաւորութիւնը այնտեղ է հասնում, որ յանուն իր հիմնարկած քաղաքի բարգաւաճման, հայերի համար կառուցում է եկեղեցի, նրանց թոյլատրում է ազատորէն շարժուեն իրենց ազգային եկեղեցու դաւանութեամբ այն դէքում, երբ նոյն ժամանակ Վատիկանը եւ լատին եկեղեցին ամենանզիջում եւ վճռական գործողութիւններով ձգտում էին դաւանափոխել հայերին:

Այս իրողութիւնը բաւական է համոզուելու համար, որ իշխան Պոտոցկին եւս, ինչպէս Ռութէնիայի եւ միջնադարեան Լեհաստանի իշխաններն ու թագաւորները, հայերին ամէն գնով սիրաշահում էին նրանց շինարարական արուեստը եւ տուածուրիկ ձեռներէցութիւնը նորահիմն քաղաքների բարգաւաճմանը ծառայեցնելու համար:

Ուշ միջնադարեան Լեհաստանի ամենաաշխոյժ եւ հարուստ հայկական կատարներից մէկը՝ Զամոստիչն, հիմնել է իշխան Եան Զամոյսկին, 1580 թ.: Բարոնչը լեհերէն թարգմանութեամբ ամբողջութեամբ բերում է հայերէն առած Զամոյսկու 1585 թ. Ապրիլ 3ի արտօնագիրը, որով նրանց թոյլատրում էր բնակուել քաղաքում, ազատորէն զբաղուել առեւտրով ու արհեստներով, շարժուել իրենց դաւանութեամբ ու օրէնքներով, կառուցել եկեղեցի ու տներ (Ռես ջեյուվ, էջ 176-177): Զամոյսկու արտօնագրի մասին լսելով, պատմում է Բարոնչը, Կաֆայից, Պարսկաստանից, Կեսարիայից, Կապաղովկիայից, Երեւանից եւ ամբողջ Փոքր եւ Մեծ Հայքերից հայեր եկան բնակուեցին այստեղ: Լվովից Զամոյսկու հրատիրած Լուկաշ քահանան փայտաշէն եկեղեցի հիմնեց այստեղ, ժամակարգութիւն հաստատեց եւ Գալուստ քահանային* նշանակեց եկեղեցում: Սրա յաջորդ Յակոբ Ալթունովիչը քարաշէն եկեղեցի կառուցելու համար 1623 թ. տեղի վաճառականներից զրամ հանդանակեց, իսկ եան Զամոյսկու որդի Տոմաշ Զամոյսկին, հօր մահուանից յետոյ, 1625 թ. հաստատեց 1585 թ. արտօնագիրը եւ իր միջոցներից¹⁶²⁸ 1628 թ. զրամ յատկացրեց եկեղեցու կառուցման համար, որը 1633 թ. արդէն կանգուն էր: «Հայերն այստեղ ի վերջոյ այնքան հաւաքուեցին, - շարունակում է պատմաբանը, - որ նոյնիսկ հայոց դատարան հիմնուեց... Յետպայում, 1784 թ. ... այստեղ համարեայ հայ չէր մնացել»³⁵: Մ. Բժշկեանը 1820 թ. Զամուտիչում հայ չի տեսել³⁶, մինչդեռ Ա. Ալթունեանը 1876 թ. զրում է: «Եթէ ազգաբանական հետազոտութիւն մը ըլլայ, թերեւս 100 ընտանիքի չափ հայ կ'ելլէ, բայց օտարաց հետ խնամիութեամբ կորսուածի պէս են... Հայոց փառաւոր եկեղեցին լեհացիք գրաւած են այժմ»³⁷: Զամոստիչի 1586 թ. հիմնարկութեան եւ իշխան Զամոյսկու կողմից նոյն թուին հայերին այստեղ հրակելուու մասին նշուած է նաեւ «կամենից տարեգրքում»³⁸:

Լեհաստանի հայոց գաղթավայրերի աշխարհագրութեան համար առանձնապէս կարեւոր են Կրակով, Լուբլին, Վարշաւա, Ֆորուն, Սոլուն, Ստրիյ եւ Ժուկով բնակավայրերում հայոց գաղութներ լինելու մասին բարոնչի տուեալները, որովհետեւ այդ

* Զամոստիչի առաջին հայ քահանայ Գալուստի մասին տեղեկութիւն պարունակող փաստաթուղթը, որից օգտուել է Բարոնչը, այժմ պահուում է Վրոցլավ Օսոլինսկիների գրադարանի ձեռագրատանը (թիւ 3618/2):

43. Ս. ԲԱՐՈՒՆՉ, Ռըս ջեյուվ, էջ 176-177:

44. Մ. Բժշկեան, Ճանապարհորդութիւն ի Լեհաստան..., էջ 127:

45. Ա. ԱԼԹՈՒՆԵԱՆ, Տեղեկագրութիւն հայոց գաղթականութեան..., էջ 135:

46. Ղ. ԱԼԻՇԱՆ, Կամենից տարեգրիք..., էջ 54:

վայրերի հայերի վերաբերեալ շատ քիչ տեղեկութիւններ են յայտնի:

Բարոնչի տուեալներով Կրակովում հայերի մասին յիշատակութիւն կայ դեռեւս Վլադիսլաւ Վարնենչիկի (1425-1444) ժամանակներից: «Այդ քաղաքի ուաղայի վճռագրերում նշուածէ, - գրում է լեհահայ պատմաբանը, - որ Թրանցիշեկ հայը սեփական կամքով իրեւ սեփականութիւն Վլադիսլաւ Վարնենչիկին է տուել թէ իր ունեցուածքը եւ թէ՛ իր անձը, այն է՝ պարտաւորուեց քանի ողջ է, թագաւորի խոհանոցին տրամադրի այնքան ճաշի աման, կաթսայ եւ այլ սպասելէն, որքան որ պէտք լինի: Իսկ դրա համար թագաւորն իրեն ոչ մի դրամական հատուցում չպիտի տար: Եթէ անժամանակ մահանար, Լվովում եւ այստեղ (Կրակովում: Ռ. Հ.) գտնուող իր ամբողջ շարժական ու անշարժ ունեցուածքի մէկ կէսը պիտի մնար իր երեխային, իսկ մնացած կէսը՝ թագաւորին» (Մըս Ճեյուվ, էջ 99): Քանի որ մինչեւ 1611 թ. Լեհաստանի արքայանիստ մայրաքաղաքը Կրակովն էր, ապա Կրակովում ժԶ. դ. հայ բնակչութիւն լինելու անուղղակի կրուան կարելի է դիտել նաեւ Բարոնչի մի քանի այլ փաստեր եւս: Օրինակ, առանց աղբիւրը նշելու նա գրում է թէ Սիգիզմունդ Բ Աւգուստի (1548-1572) «անձնական պահազօրը կազմում էին հայերը» (Մըս Ճեյուվ, էջ 63), Յակոբ Նուր-կելիչը նրա դեսպանն էր (Ժուտու սլաւնըն օրմիան, էջ 254-255) եւ այլն:

Հետաքրքիր է դիւանական աղբիւրներից քաղած Մ. Զակժեւկա-Դուբաստովայի մի տեղեկութիւնը, թէ այդ նոյն թագաւորի պալատական երեք դերձակները հայեր էին⁴⁷: Կը նշանակի Կրակովում ապրել են նաեւ հայ արհեստաւորներ: Նոյն պատմաբանի այն տեղեկութիւնը, թէ 1550-1552 թթ. այստեղ մեծ քանակութեամբ տաճկական քրում (շաֆրան) է վաճառուել⁴⁸, որը հիմնականում հայերն էին իրացնում, հիմք է տալիս ենթադրելու, որ Կրակովում ժԶ. դ. գործել են նաեւ հայ վաճառականներ՝ թէեւ պատմագիտական գրականութեան մէջ կան փաստեր, որոնք թոյլ են տալիս պնդելու, որ հայերը Կրակովում առեւտուր էին անում դեռեւս ժԴ. դ.: Օրինակ՝ Ալ. Զոլովսկու հրատարակած Լվովի քաղաքապետարանի վճռագրերում արձանագրուած են Ասլան Փանոսովիչ, Բոգդան Խորովիչ եւ այլ հայ վաճառականներ, որոնք Կրակովցի վաճառականներից

47. M. ZAKRZEWSKA-DUBASOWA, *Ormianie w dawnej Polsce*, Lublin, 1982,
էջ 163:

48. Անդ, էջ 130-131:

պարտքով փող են վերցրել, ապրանք են գրաւ գրել եւ այլն⁴⁹: Կրակովի հայ բնակչութեան մասին Բարոնչի տուեալներն առատ են մանաւանդ Ժէ-Ժլ. ղարերում: Այսպէս՝ Աւգուստին Պերս հայը 1613 թ. մտնում է Կրակովի Դոմինիկեան միաբանութիւն, Անտոնի հայը 1617 թ. Կրակովի Կարմելիտեանց ուխտի անդամներից էր, և Սերեբրովիչը 1650 թ. քաղաքի Դոմինիկեան ճեմարանում աստուածաբանութեան դոկտոր էր (Ժուլտը սլաւնըն օրմիան, էջ 257, 286), լվովցի հարուստ վաճառական Դ. Բոդղանովիչը 1680 թ. Կրակովում տուն ունէր, Յակոբ Դերյակուրովիչը, Կոստանդինը եւ Ղազարը մօտ 1740 թ. քաղաքային ուսուայի անդամներից էին, Միխալ Աւեղիկը այդ ժամանակ Կրակովի ստրելեցների դպրոցի տնօրինն էր եւ այլն (Ռըս ջեյուվ, էջ 99): Սակայն Բարոնչի այն տեղեկութիւնը, որ հայերն այստեղ ոչ եկեղեցի են ունեցել, ոչ քահանայ, ցոյց է տալիս, որ Կրակովի սակաւաթիւ հայութիւնը երեւի երբեք կազմակերպուած գաղութ չի կազմել:

Հիմնուելով Լվովի հայոց դատարանի վճռագրերի պքայ Բարոնչը գրում է, որ Լուբլինում հայերը եկեղեցի են ունեցել, իսկ տեղի վաճառականները մօտ 1600 թ. այստեղից Մոսկուա էին արտահանում ապրանքներ, դրանց դիմաց գնում էին մոմ, կաշի (եռլիֆտ), սամոյր եւ տանում էին Գդանսկում վաճառելու (Ռըս ջեյուվ, էջ 104): Ալոիսիոս Պիդուն Լվովի հայոց ճեմարանի աշակերտներին թուելիս, նշում է նաև 16ամեայ մի լուբլինահայի⁵⁰: Մ. Բժշկեանը եւս Լուբլինում հայոց եկեղեցի է տեսել, որը 1820 թ. արդէն լեհերի ձեռքն էր «առ ի չգոյէ անդ հայոց»⁵¹: Լուբլինի հայոց եկեղեցու մասին Ա. Ալթունեանը 1876 թ. գրում է. «Հայոց քարաշէն սիւնազարդ ու փառաւոր եկեղեցին լեհաց ձեռքը կը գտնուի, որոյ շատ կողմերը հայերէն ու լատիներէն լեզուաւ խառն արձանագրութիւններ կը տեսնուին եւ որոյ բակը մէկ քանի հայերէն տապանաքարեր կան: Կ'ըսեն այս եկեղեցւոյ հազարի մօտ մատեանները տէրութիւնը գրաւած է»⁵²: Հիմնուելով դիւնական փաստաթիվերի ու հին վճռագրերի վրայ, Լուբլինում հայ վաճառականների գոյութեան մասին Բարոնչի տեղեկութիւնները հաստատող տուեալներ է բերում Մ. Զակժեւսկա-Դուբասովան⁵³:

49. Pomniki dziedzicowe Lwowa, t. 1, najstarsza księga miejska 1382-1389, Wydal Al. Czołowcki we Lwowi, 1892, dok. N. 98, էջ 148:
50. Բոնի միուրիւմ Լեհաստամի..., էջ 104:
51. Մ. Բժշկեան, ձանապարհորդութիւն ի Լեհաստամ..., էջ 127:
52. Մ. Ալթունեան, նշ. աշխ., էջ 135:
53. ԶԱԿԺԵՎՍԿԱ-ԴԻԲԱՍՈՎԱ, նշ. աշխ., էջ 140-142, 203:

Արեւելեան ապրանքները դիւրութեամբ վաճառելու պարագան, - զրում է Բարոնչը Վարշաւայի հայոց գաղութի մասին, - հայերին առաջնորդեց այս քաղաքը, ուր նրանք արդէն 1670 թուին, ի դէմս Գաբրիէլ Զախնովիչի, կապելլան (տնային քահանայ) ունէին: 1689 թ. այստեղի հայոց քահանայ Եռլեֆֆ Մըսըրովիչը հայկական ժամասացութիւնը կատարում էր Աւգուստինեան եկեղեցում... իսկ նրա յաջորդը՝ Բենեդիկտեան եկեղեցում» (Մըս ջեյուկ, էջ 176): Քաղաքում 1672 թ. ինքնուրոյն հայոց եկեղեցի չինելու մասին է զրում «տաճկաց» յարձակումի պատճառով Լվովից վարչաւա փախած Գրիգոր ոսկերիչը իր կազմած սաղմոսարանի յիշատակարանում. «Գրեցաւ եւ կատարեցաւ Ս. երգարանս... ի քաղաքս Վարշաւ, ձեռամբ անարժան եւ բազմամեղ ոսկերիչ Գրիգորի..., եւ եկեալ տեսաք զքաղաքն Վարչաւ, որ ոչ ունին իւրեանց առանձին եկեղեցի մեր հայոց ազգս, եւ ոչ մին փոքրիկ աղօթատեղի...»⁵⁴: Վարչաւայի 1691 թ. ծխամատեաններից քաղած տեղեկութիւնների վրայ յենուելով՝ քաղաքի հայոց քահանայ Եռլեֆֆ Մըսըրովիչին յիշատակում է նաեւ Ֆր. Զախարիասեւիչը⁵⁵: Բայց վարչաւահայերի վերաբերեալ ամենավաղ տեղեկութիւնը վերաբերում է ԺԶ. Պարավերջին: Խօսելով 1602 թ. Պարսկաստան գնացած Վարչաւացի Սեֆէր Մուլատովիչի մասին, Բարոնչը զրում է, որ սրա հայրը Սիփիզմունդ Գ. ի պալատականներից էր (Ժըլուտը, էջ 234): 1672 թ. Եազլովից թուրքերին անցնելուց յետոյ Վարչաւա հաստատուեց Մինասովիչների մի ճիւղը, որը բազմաթիւ պետական-հասարակական եւ մշակութային գործիչներ է տուել քաղաքին (Ժըլուտը, էջ 202-218):

Հետաքրքիր է Բարոնչի այն տեղեկութիւնը, որ յայտնի վաճառական Գրիգոր Լըշկեւիչը 1750 թ. Վարչաւայի քաղաքավուկին էր (բուրմիստր), իսկ 1781ին քաղաքային ուաղայի նախագահը (Ժըլուտը, էջ 179):

Բարոնչի ու Մ. Զակժեւսկա-Դուրասովայի տուեաններով ԺԼ. դ. այստեղ եղել են նաեւ հայ ձեռնարկատէրեր, որոնց մասին կը խօսենք իր տեղում: Տ. Գրոմնիցկու հաշումներով, 1780 թ. Վարչաւայում 50 տուն կար⁵⁶:

Որոշակի հետաքրքրութիւն են ներկայացնում Ստրիյ, Ժուկով եւ Տորուն բնակավայրերում հայեր ապրելու մասին Բարոնչի թէեւ շատ թուուցիկ, բայց արժէքաւոր տեղեկութիւնները:

54. Կամենից տարեգիրք..., էջ 194:

55. FR. ZACHARYJASIEWICZ, *Wiadomości o Ormianach w Polszcze*, էջ 9, թիւ 2 ծանօթագրութեան մէջ:

56. T. GROMNICKI, *Ormianie w Polsce*, Encyklopedia kościelna, t. 17, էջ 447:

Ժուկովի հայոց գաղութի մասին տուեալը նա քաղել է Ստանիսլաւի հայոց եկեղեցու 1712 թ. մի լատիներէն ձեռագրից, որի համապատասխան հատուածը մէջբերելով, այս քաղաքը ժԷ. դ. հայոց գաղութի է համարում (Խըս ջեյուվ, տե՛ս էջ 179ի տողատակի ծանօթութիւնը): Մարիյ քաղաքի հայ բնակչութեանը վերաբերող տուեալը նա քաղել է Լվովի հայոց դատարանի վճռագրերից (Խըս ջեյուվ, էջ 172ի թիւ 159 ծանօթագրութիւնը): Տորունի մասին նշում է թէ հայ վաճառականներն այստեղ ժԶ. դարից սկսած առեւտուր էին անում (Ժըլոտը, էջ 70, 174), իսկ լվովցի հայ վաճառականները Տորունում կրպակներ ունէին (Խըս ջեյուվ, էջ 172ի թիւ 159 ծանօթագրութիւնը): Սակայն դիւանական փաստաթղթերից երեւում է, որ հայերը Տորունում առեւտուր էին անում շատ աւելի վաղ՝ 1382 թուին: Այսպէս, Ալ. Զոլովսկու հրատարակած Լվովի քաղաքապետարանի դատական վճռագրերից երեւում է, որ Տորունը այդ ժամանակներում հայ վաճառականների հիմնական հանգուուաններից մէկն էր: Ցիշեալ ժողովածուներում պահպանուել են լվովահայ մի քանի վաճառականների անուններ (Խաչերես Տոլմաչ, Պետրոս Բուղա, Ամիր), որոնք ժԴ. դ. 80ական թուերին աշխոյժ առեւտուր էին անում Տորունի վաճառականների հետ⁵⁷:

Ժէ. դ. հիմնուած հայոց գաղութներից Բարոնչը համեմատաբար առատ տեղեկութիւններ է տալիս Բրոդի, Զոլոչովի, Լիսեցի, Ժըլանեցի ու Բերեժանիի մասին:

Բրոդիի հայ գաղութը թէեւ երկար չի տեւել, բայց ինչպէս ուկրայինացի պատմաբան եա. Մելնիչուկն է նշում, Ժէ-Ժը դիչ գեր չի խաղացել «Արեւմտեան Ուկրայինայի հողերի քաղաքական ու տնտեսական կեանքում»⁵⁸: Ինչպէս հայոց գաղթավայրերի մեծ մասի, այնպէս էլ Բրոդիի մասին եւս լեհ պատմագիտութեան մէջ առաջին ընդարձակ տեղեկութիւնները Բարոնչն է յայտնել: «Լեհաստանի նշանաւոր հայոց վարքը» աշխատութեան մէջ նա նշում է որ 1865 թ. Անտոնի Աքենտովիչը Բրոդիի հայոց վոյթն էր, իսկ բրոդցի Տըսկեր Վարդերեսովիչը 1659 թ. եան Կազմիրի թագաւորի պալատականը (Ժըլոտը, էջ 56, 352): «Առեւտրական ազատ քաղաք Բրոդին» աշխատութեան մէջ նա Բրոդիի հայոց գաղութի հաւաստի գոյութիւնը ընդունում է 1641 թուականից՝ հիմնուելով լեհ գորավար, հեթման Ստ. Կոնիեցալուկուն (1594-1646) ուղղուած լեհ իմաստասէր եւ

57. Pomniki dziejowe Lwowa, t. 1, najstarsza księga miejska 1382-1389, Wydal Al. Czolowcki Lwow, 1892, dokument N. 397, 512:

58. Я. Мельничук, Армянские поселение в Бродах, ԽՄԴ - 1971, էջ 250:

գրող Մ. Կոմանդարձկու 1641 թ. Յունուարի մէկի մի շնորհաւորական նամակի վրայ: Այս նամակում նշուած է, որ Բրոդիի հայերը իրենց քեղ ապրանքներով հարուստ փայլ են տալիս այդ քաղաքին⁵⁹: Նոյն էջի տողատակի ծանօթութեան մէջ, յղելով համապատասխան փաստաթուղթը, պատմաբանը գրում է որ հեթման Կոնիեցպոլսկու քերթուածների մէջ եւս խօսք կայ բրոդցի հայերի մասին, իսկ յղեալ գրքի 24րդ էջում, համապատասխան դիւանական նիւթերի վրայ հիմնուելով գրում է, որ բրոդցի հայ վաճառական Լուկաշ Մարտիրոսը, 1642 թ. ապրանքներ գնած - Բրոդի վերադառնալիս, սպանուում է աւազակների ձեռքով: Ժէ. դ. առաջին կէսին Բրոդիում հայոց գաղութ լինելու օգտին նա բերում է եւս մի վաւերական կոռուան. Եազլովեցի քաղաքապետարանի 1652 թ. վճռագրերը յիշատակում են, որ Եազլովեցի Հաջիեւիչները բրոդցի հայ վաճառական Ասլան Ամիրովիչին 1500 տալեր փող են պարտք եղել⁶⁰: Հեթման Կոնիեցպոլսկու ժամանակներից Բրոդիում հայոց գաղթօջախ լինելու Բարոնչի բերած տուեալները լրացնում է ուկրայինացի գիտնական ի. Սաղինսկին, որը գաղութի վերաբերեալ Բարոնչի նշած հնագոյն յիշատակութիւնը երեք տարով ետ է տանում: Համապատասխան վաւերագիրը յղելով, նա գրում է, որ Ստ. Կոնիեցպոլսկին 1638 թ. իր հովանաւորութեան տակ է վերցրած եղել բրոդցի հայեր Մարկ Սերգիյովիչին եւ Նիկոլայ Զախար Մարկեւիչներին⁶¹: Բրոդիի հայոց գաղութի սկզբնաւորումը Ժէ. դ. առաջին կէսին են դնում գաղթավայրին անդրադարձած մասնագէտների ճնշող մեծամասնութիւնը (Վ. Պլոչչանսկի, Վ. Գրաբովեցկի, Պ. Պիրոժենկոյ, Եար. Դաշկեւիչ, Եա. Մելնիչուկ եւ այլք):

Ցղելով Լկովի հայոց եկեղեցու վճռագրերը եւ լեհ պատմաբան Օստրոգոդին, Բարոնչը Զոլոչեւի հայոց գաղութի հիմնարկութիւնը վերագրում է Եազլովեցի հայերին, որոնք 1676 թ. յետոյ եկան այստեղ, Հինմեցին փայտաշէն եկեղեցի եւ շարունակեցին զբաղուել առեւտրով (Մըս Ճեյուկ, էջ 178): Լ. Խարեւիչնու վանական գաղութի սկզբնաւորումը դնում է Ժէ. դարավերջին՝ ի նկատի ունենալով հայերին Զոլոչեւ հրաւիրելու մասին Եան Սորեսկու 1688 թ. հրովարտակը⁶²: Լեհ պատմաբան Բ. Սոկալս-

59. S. BARACZ, *Wolne miasto handlowy Brody*, Lwow, 1865, էջ 23:

60. Անդ, էջ 47ի թիւ 74 ծանօթագրութիւնը:

61. Յ. Մելինչուկ, Արմանական գույք Եարական գույք 1971, էջ 252:

62. Մ. ՅՈՎՃԱՆՆԻՍԵԱՆ, Ուրուագծեր Լեհաստանի եւ Արևմտեան Ուկրայինայի հայկական գաղթավայրերի պատմութեան, Երեւան, 1977, էջ 3:

կին, վկայակոչելով այն տեղեկութիւնը, թէ Լեհաստանի թագաւոր Սիգիզմունդ Ալգուստը 1530ական թուականներին այդ քաղաքի իշխան Լուկաշ Գուրկային դրամական միջոցներ է յատկացրել տեղում հայոց եկեղեցի կառուցելու համար, Զոլոչովի հայոց գաղութի հիմնարկութիւնը վերաբրում է նազովեցի հայերին, որոնք 1676 թ. յետոյ եկան այստեղ, հիմնեցին փայտաշէն եկեղեցի եւ շարունակեցին զբաղուել առեւտրով (Ռըս ջեյով, էջ 178): Լ. Խարեւիչովան գաղութի սկզբնաւորումը դնում է ժէ. դ. վերջին՝ ի նկատի ունենալով հայերին Զոլոչեւ հրաւիրելու մասին նաև Սոբեսկու 1688 թ. հրովարտակը: Լեհ պատմաբան Բ. Սոկալսկին, վկայակոչելով այն տեղեկութիւնը, թէ Լեհաստանի թագաւոր Սիգիզմունդ Ալգուստը 1530ական թուականներին այդ քաղաքի իշխան Լուկաշ Գուրկային դրամական միջոցներ է յատկացրել՝ տեղում հայոց եկեղեցի կառուցելու համար, Զոլոչովի հայոց գաղութի սկզբնաւորումը դնում է ժօ. դարի 30ական թուականները⁶³:

Բարոնչը ժէ. դ. հիմնուած գաղթավայրերից է համարում նաեւ Լիսեցը, թէեւ չի ժիտում այստեղ աւելի վաղ ժամանակներում հայերի բնակութեան հնարաւորութիւնը: Գաղութի մասին Բարոնչին յայտնի հնագոյն յիշատակութիւնը վերաբերում է 1692 թ.: Այդ թուին Լիսեցի հայ վաճառականները ապրանքներ են արտահանել Լվով: Պ. Պիրոժենկոն, հիմնուելով Լվովի կեղրոնական պատմական դիւտանի վաւերանիւթերի վրայ, գրում է, որ 1669 թ. Լիսեցում հայոց եկեղեցի կար⁶⁴: Լստ Բարոնչի, հայերի թիւը այս գաղութում 1782 թ. 250 էր, իսկ 1808ին՝ 300 (Ռըս ջեյով, էջ 156): Սա. Ագոնցը ժէ. դարավերջին նշում է որ քաղաքի 1390 բնակիչներից 340 չունչը հայ են, 150ը լեհ, 500ը ռումին, 400ը հրեայ⁶⁵: Լիսեցի ժէ. դ. գաղութ են համարում նաեւ Լ. Կորվինը, Մ. Զակժեւսկա-Դուքասովան եւ ուրիշներ:

Բէրէժանիի հայ բնակչութեան մասին ամենավաղ տեղեկութիւնը Բարոնչին յատնի է 1686 թ.: Լվովի քաղաքապետարանի դիւտանում եղել է Բէրէժանիի հայոց քաղաքային վարչութեան վոյթ Դաւիթ Ամբրովիչի 1686 թ. մի գրութիւնը, որտեղ նշուած է եղել, թէ Բէրէժանիի ու Լվովի հայ վաճառականների վրայ եասսիր մօտ աւագակներ են յարձակուել, մէկին սպանել են,

63. В. Григорян, История армянских колоний Украины и Польши, Ереван, 1980, էջ 118:

64. П. Пироженко, Материалы ЦГИА во Львове по истории армянских колоний на Украине, ԽՍՀ - 1961, էջ 249:

65. US. ԱԳՈՒՑ, նշ. աշխ., էջ 141:

միւսներին գերել: *Փաստաթղթում նշուած է նաեւ, որ հայերը այստեղ 200 տուն ունէին եւ մի փայտաշէն եկեղեցի (Ծրս ջեյով, էջ 77): Քաղաքում 1686 թ. 200 հայ ընտանիք լինելու օգտին է խօսում Մ. Բժշկեանի մի տուեալը⁶⁶, ըստ որի հայերն այնտեղ մի ժամանակ 200 տուն էին, իսկ այժմ (1820 թ.: Ռ. Հ.), 60 տուն: Ստ. Ռոշքան Ժէ. դարավերջին Բէրէժանիի մասին գրում է. «... Բնակին յազգէ մերմէտ իբրեւ 120 գերդաստանի (մօտ 600 շունչ): Ռ. Հ.) եւ առաւել, որք ունին անդ եւ եկեղեցի եւ քահանայս»⁶⁷: Հետաքրքիր է ուկրայինացի գիտնական Դ. Մըշկոյի տեսակէտը: Նա, ցաւօք առանց աղքիւրը նշելու գրում է, թէ հայերը առաջին անգամ մուտք են գործել Բէրէժանի ԺԴ. դարավերջին եւ որ նրանց մասին գրաւոր առաջին յիշատակութիւնը վերաբերում է ԺԵ. դարասկզբին, իսկ արդէն 1530 թ. նրանք այստեղ սեփական վոյթ ունէին⁶⁸: Եար. Դաշկեւիչը, Վ. Գրիգորեանը, Մ. Զակիմեսկա-Դուբասովան եւ այլք Բէրէժանի հայոց գաղութի սկզբնաւորումը դնում են Ժէ. դարակէսին: Բարոնչի տուեալներով հայերն այստեղ 1764 թ. քարաչէն եկեղեցի են կառուցում, հիմնում են դրամատուն-լոմբարդ⁶⁹, բայց ԺԼ. դարակէսին գաղութը սկսում է քայքայուել: 1738 թ. այստեղ 177 հոգի հայ կար, իսկ 1860ական թթ. կէսերին՝ 100ի չէր հասնում (Ծրս ջեյով, էջ 79-80): Ա. Ալթունեանը 1876 թ. Բէրէժանիում 30 տուն հայ է հաշուել⁷⁰:*

ԺԼ. դ. գաղութներից Բարոնչը համեմատաբար հարուստ նիւթեր է տրամադրում Զէրնովցիի, Մոգիլեւ-Պոդոլսկի եւ Կուտահի մասին:

«Թէեւ Բուքովինայի մայրաքաղաք Զէրնովցին Լեհաստանին չի պատկանել - գրում է Բարոնչը - բայց դնում ենք այստեղ (գրքում: Ռ. Հ.), որովհետեւ մինչեւ այժմ Զէրնովցին գտննում է Լվովի հայոց արքեպիսկոպոսի իրաւադրութեան տակ (իւղիսդիկցիա) տակ: Գրիգոր Այվազի որդիներ ներսէսը, Ստեփանը եւ նիկոլայը Մոլդավիայից եկան Զէրնովցի, ուր հիմնելով առեւտուր, կառուցեցին շատ տներ... Նրանց ետեւից բազմաթիւ հայեր եկան եւ արդէն 1820 թ. նրանք այստեղ 30 տուն էին

66. Մ. ԲԺՇԿԵԱՆ, Ճամապարհորդութիւն ի Լեհաստան..., էջ 124:

67. ՄՏ. ԳԻՒՎԵՐ ԱԳՈՆՑ, Աշխարհագրութիւն չորից մասանց աշխարհի, մասն երկրորդ, Հար. Բ., էջ 141:

68. Դ. Մանուկյան, Հայոց ազգագրութիւն և պատմութեան մասին, էջ 189:

69. S. BARACZ, Zywoty S. Stefanowicza, Dodadek tygodniowy przy Gazecie Lwowskiej, 1869, թիւ 32, էջ 138. տե՛ս նաեւ՝ Ծրս, էջ 78:

70. Ա. ԱԼԹՈՒՆԵԱՆ, Տեղեկագրութիւն հայոց գաղթականութեան, Ֆոքշան, 1877, էջ 133-134:

(Ռըս ջեյուվ, էջ 81): Բարոնչի տեղեկութիւնը հաստատում է Բժշկեանի ստոյդ տուեալով, ըստ որի, 1820 թ. այստեղ 30 տուն հայ էր բնակում⁷¹: «Լեհաստանի նշանաւոր հայոց վարքը» աշխատութեան մէջ լեհահայ պատմաբանը գրում է որ Այվազի որդիները Զէրնովցի են մտել ԺԼ. դ. 70-80ական թթ. եւ 1789 թ. աւտորիական կայսեր թոյլտուութեամբ Բուքովինայում կալուածներ են գնել՝ յետագայում աւելի ընդարձակելով այդ կալուածները թէ՛ Գալիցիայի, թէ՛ Բուքովինայի հողերում (Ժըվոտը, էջ 7): 1833 թ. Զէրնովցի հայերը Լվովի հայոց արքեպիսկոպոսին խնդրում են, որպէսզի նա քաղաքի ու շրջակայ գիւղերի հայ բնակչութեան համար հայ քահանայ առանձնացնի: Արքեպիսկոպոսը աւտորիական կայսեր թուկտուութեամբ 1840 թ. այստեղ հիմնում է Լվովի հայոց թեմի նոր վիճակ, որը սպասարկում էր 600 հայերի⁷²: Հայոց եկեղեցի հիմնելու ծախսերը հոգալու համար կազմում է մի հանգանարկու յանձնախումբ, որը հայերէն, լեհերէն եւ ֆրանսերէն լեզուներով մի կոչ է տարածում ժողովրդի մէջ՝ յորդորելով միջոցներ շնայել հայոց եկեղեցու հիմնարկութեան համար, որը «պէտք է դառնայ հայերի ազգային, ընտանեկան ու կրօնական համախմբման կէտ»⁷³:

Մոգիլիով-Պոդոլսկի հայոց գաղութի սկիզբը Բարոնչը համարում է 1742 թ. հայոց Ս. Գրիգոր եկեղեցու շինութիւնը եւ 1743 թ. Ֆր. Պոտոցկու արտօնագիրը հայերին՝ ինքնավարութեան մարմին ստեղծելու, սեփական վոյքի գլխաւորութեամբ առանձին դատարան ունենալու, առեւտրով ու արհեստներով ապատօքն զրադուելու մասին (Ռըս ջեյուվ, էջ 156-158): Հիմնուելով Ս. Բժշկեանի վրայ, Բարոնչը գրում է, որ 1820 թ. այստեղ 60 տուն հայ կար, որոնք առեւտրական կապերի մէջ էին Արեւմտեան Երկրների, Բրոդի, Լիտուայի եւ նոյնիսկ Ստամբուլի հետ (Ռըս ջեյուվ, էջ 162):

Հայահիմն Կուտի քաղաքը լեհահայ այն եզակի գաղութներից էր, որտեղ հայերը իրենց բարբառը, սովորութիւններն ու ազգութիւնը պահպանել էին մինչեւ 1960ական թուականները: Կուտիի մասին Ս. Բժշկեանը գրում է. «Յառաջադոյն անտառամոլ էր, ապա 20 տունք Հայոց եկին անդ հրաւիրմամբ Օգոստոսի թագաւորին լեհաց (Աւգուստ Բ. ի մասին է խօսքը: Ռ. Հ.), որ ետ նոցա պարզեւագիր արտօնութեանց ի 1715 թուակի 18

71. Ս. ԲժՇԿԵԱՆ, Ճանապարհորդութիւն ի Լեհաստան..., էջ 189:

72. Ս. ԲԱՐՈՒՁԻ, Ռըս ջեյուվ օրմիամսկին, էջ 81-82:

73. Ռըս ջեյուվ, էջ 82-83:

զոր եւ տեսաք: Որով սկսան Հայք շինել զայս քաղաք եւ առաջին հիմնարկողն եղեւ Շատպէյ հայ վաճառական, որ եկն ի Սոլտովիոյ»⁷⁴:

Գրեթէ նոյնն է հաղորդում նաեւ Ստ. Ագոնցը, որը նոյն արտօնագիրը կարդացել էր 1791 թուին⁷⁵: Բարոնչը նոյնաշխ նշում է որ քաղաքի հիմնագիրը մոլդաւահայ վաճառական Շատպէյն էր, բայց չի նշում, որ հայերը 20 ընտանիքով եկան այստեղ, իսկ նրանց տրուած 1715 թ. արտօնագիրի հեղինակին համարում է իշխան եռուզ. Պոտոցկուն⁷⁶: Լեհահայ բանասէր Մ. Սոյզէսովիչը, հիմնուելով Բարոնչի տեղեկութեան վրայ, 1715 թ. հայերին տրուած արտօնագիրի հեղինակը Պոտոցկուն է համարում⁷⁷: Քանի որ Բարոնչը իր այս պնդումը չի ամրագրում որեւէ փաստաթղթի յիշատակումով, ուստի հիմք ենք ընդունում Ստ. Ագոնցի ու Մ. Բժշկեանի տեղեկութիւնները, քանի որ նրանք աչքի են անցկացրել կուտեցիններին տուած Աւգուստ Բ.ի 1715 թ. արտօնագիրը: Սակայն Բարոնչը մէջբերում է Աւգուստ Գ.ի 1756 թ. Յուլիսի 10ի արտօնագիրը, որով բազմաթիւ արտօնութիւններից բացի, կուտեցի հայերին թոյլատրում էր եկեղեցի կառուցել (Ռըս ջեյուվ, էջ 100-101): Ուկրայինացի գիտկան Վ. Գրաբովիցին 1715 թ. արտօնագիրի մասին ոչինչ չի հաղորդում, միայն նշում է որ հայերն այստեղ բնակում են 1715 թուից՝ առանց շեշտելու, որ քաղաքը հէնց այդ թուին հիմնել են հայերը⁷⁸: Յաւօք օտար հեղինակների այս խոտելի սկզբունքը գալիս է հնուց, փոխանցում է սերնդէ-սերունդ եւ ուղղուած է հայաշատ բոլոր քաղաքների հիմնարկութեան մէջ հայերի դերի նուազեցմանը:

Կոտաիի հայերի թիւը մօտ 1787 թ. Բարոնչը նշում է 396 հոգի, իսկ 1765 թ.՝ 70 տուն, 1808 թ.՝ 804 չունչ՝ շեշտելով, որ խօսում են հայերէն (Ռըս ջեյուվ, էջ 102-104): Լկովցի գիտնական Պ. Սիրեծուկը, յղելով Լկովի կեղրոնական պետական դիւանի վճռագրերը, գրում է որ 1765 թ. Կուտամում 70 հայընտանիք կար⁷⁹: Մ. Բալինսկին, Տ. Լիպինսկին եւ եռուզ. Յելե-

74. Մ. ԲԺՇԿԵԱՆ, նշ. աշխ., էջ 127:

75. Ա. ԱԳՈՆՑ, Աշխարհագրութիւն չարից..., էջ 142:

76. Մ. ԲԱԼԻՆՉ, Ռըս ջեյուվ, էջ 100:

77. M. MOJZESOWICZ, *O Ormianach w Kutach, Posłaniec Sw. Grzegorza*, N. 1, Lwow, 1927, էջ 6:

78. В. Грабовецкий, Армянские поселение в Кутах, ԽՄԴ - 1971, էջ 255:

79. П. Сиреджук, Розселение и численность армян в Галицком Прикарпатье в XVII-XVIII вв., Պատմարանափական համելս, 1974, թիւ 1, Երեւան, էջ 139:

ՎԻՃ 1739 թ. այստեղ 50 տուն հայ են նշում, իսկ 1884 թ.՝ շրջակայ բնակչութեան հետ միասին՝ 1800 հոգի⁸⁰: 1791 թ. Ստ. Ագոնցն այստեղ 125 տուն հայ է հաշուել, աւելի քան 760 շունչ⁸¹: Մ. Բժշկեանը 1820 թ. Կոտիկում 3000 հայ բնակչութիւն է հաշում⁸², Զ. Լեխիցկու տուեալներով⁸³ կուտեցի լեհահայ երաժշտագէտ եւ բանասէր Զրիցնել Կոստիկովը նշում է, որ 1983 թ. այս գիւղում 25 հայ ընտանիք էր բնակւում⁸⁴:

Տըսմենիցի մասին Բարոնչը գրում է, որ մօտ 1540 թ. քաղքի հայ վաճառականների շնորհիւ այս քաղաքը ծաղկում է ապրել (Ռըս ջեյուվ, էջ 172): Այսինքն՝ պատմաբանը տեղի հայոց գաղութի սկզբնաւորումը դնում է ԺԶ. դ. առաջին կէսը: Նոյն կարծիքին են նաեւ Վ. Լոզինսկին, Մ. Զակժեւսկա-Դուրասովան եւ ուրիշներ⁸⁵: Դ. Մըշկոն, առանց որեւէ աղքիւր յղելու, գաղութի սկիզբը համարում է ԺԵ. դարի սկիզբը⁸⁶: «Յիշատակարան Լեհաստանի պատմութեան» գրքում Բարոնչը գրում է որ քաղաքի տնտեսական նշանակութիւնը բարձրացնելու նպատակով Դոմինիկ Պոտոցկին Կամենեց-Պոդլյակը լքած հայերին 1679 թ. հրաւիրեց Տըսմենից, նրանց ազատեց բերդաքաղաքի բնակչութիւնից գանձուող բոլոր տեսակի հարկերից եւ տուեց «Լեհաստանի քաղաքների ազատներին հաւասար իրաւունքներ»⁸⁷: Հետաքրքիր է նաեւ 1730 ական թթ. Տըսնեմիցի հայոց եկեղեցուն կից հայկական դպրոց լինելու մասին Բարոնչի վկայութիւնը⁸⁸, որը լեհահայ դպրոցի պատմութեան սուլ տուեալները լրացնող կարեւոր փաստ է:

Քաղաքի հայ բնակչութեան քանակը Բարոնչը չի նշում, բայց կարծում է ԺԼ. դարասկզբին բաւական քանակութեան հայութիւն կար: Շեշտելով, որ 1713 թ. քաղաքի Գրիգոր Ամիրովիչ հայ քահանան ծխամատեանները սկսեց հայերէն լրացնել՝ շարունակում է. «Այդ ժամանակ պէտք է որ քաղաքը բաւական հայաշատ լինէր, քանի որ կէս տարրուայ մէջ 30 կնունք է գրանցուել» (Ռըս ջեյուվ, էջ 172): ԺԼ. դարավերջի եւ ԺԹ. դարա-

80. В. Грабовецкий, Армянские поселение в Кутах, ԽՄԴ - 1971, էջ 255:

81. US. ԱԳՈՒՑ, Աշխարհագրութիւն..., մասն երկրորդ, ՀԱ. Բ., էջ 143:

82. Մ. Բժշկեան, ձանապարհորդութիւն ի Լեհաստան..., էջ 127:

83. CZ. LECHICKI, Kościol Ormianski w Polsce, Lwow, 1929, էջ 155:

84. ZB. KOSCIOW, Miadomosc o Ormianach Kuckich, Warszawa, 1989, էջ 4:

85. M. ZAKRZEWSKA-DUBASOWA, Ormianie w dawnej Polsce, էջ 22; «Հայրենիք», 1929, թիւ 5, էջ 82:

86. Դ. Մանուկյան, Հայոց ազգական պատմութեան մասին, ԽՄԴ - 1971, էջ 191:

87. S. BARACZ, Pamiętniki drzejów Polskich, Lwow, 1855, էջ 234-235:

88. Անդ, էջ 240:

սկզբին Տըսմենից այցելած հայ հեղինակները ճշգրիտ տուեալ-ներ են թողել քաղաքի այդ ժամանակուայ հայ բնակչութեան քանակի մասին։ Ստ. Ագոնցը գրում է, որ հայերն այստեղ 380 տուն էին. «Որք ունին քարաշէն եկեղեցի վայելուէ շինեալ ի 1750»⁸⁹: Մ. Բժշկեանը 1820 թ. 50 հայ ընտանիք է հաշուել քաղաքում, որոնք յստակ խօսում էին հայերէն, քանի որ «ի յետին ժամանակս եկին ասոտ, որպէս պատմեցին մեզ, թէ 170 ամօք յառաջ 42 տունք հայոց եկին ի Կամենիցէ եւ բնակեցին աստ»⁹⁰: Փաստորէն Մ. Բժշկեանին բանաւոր յիշողութեամբ պատմածը համընկնում է իրականութեանը: Մենք վերը դիւանական փաստաթղթերից Բարոնչից բերած յիշատակութիւնից տեղեկացանք, որ հայերը Կամեննեցից այստեղ են գաղթել 1679 թ.: Մ. Բժշկեանը ճշտում է այդ թուին Տըսմենից գաղթած հայ ընտանիքների թիւը՝ 42 տուն: Բարոնչը տեղեկացնում է, որ իր ապրած ժամանակներում (1866 թ.), Տըսմենիցում եւ շրջակայ 23 գիւղերում ապրում էր ընդամէնը 200 հայ (Ռըս ջեյուվ, էջ 175): Ստ. Ագոնցը Ժ. դարավերջին այստեղ ընդամէնը 1280 բնակիչ է հաշուել, որոնցից 300ը լեհ, 600ը ուկրայինացի, 380ը հայ⁹¹: Ա. Ալթունեանը 1876 թ. այստեղ 26 տուն հայ է տեսել⁹²:

Լիտուայի հայոց գաղթավայրերի պատմութիւնը պատմագիտութեան չուսումնասիրուած խնդիրներից է: Բարոնչը թէեւ Վիլնիսակից բացի լիտվական ոչ մի այլ քաղաքի հայութեան մասին որոշակի տուեալ չի հաղորդում, բայց այն կարծիքն է, որ հայերն այստեղ են մտել մօտ ԺԴ. դարավերջին: Հիմնուելով Տ. Կրուսինակու եւ գերմանալեզու պատմաբանների աշխատութիւնների վրայ, Բարոնչը նշում է, որ Լանկ Թիմուլի արշաւանքների հետեւանքով Հայաստանից զինեալ ասպետները «սրով իրենց ճամբան հարթեցին» դէպի Լեհաստան եւ ծառայութեան մտան նաեւ Լիտուայի մեծ իշխան Վիտոլդի* (1401-1430) մօտ, իսկ 1410 թ. հերոսացան Գրիւնվալդի ճակատամարտին (Ռըս ջեյուվ, էջ 62-63): Դիւանական փաստաթղթերի վրայ հիմնուելով, նա մի այլ առիթով գրում է, որ 1464 թ. լիտվայի, Ուկրայինայի, Պոդոլիայի, Վալաքիայի բոլոր դոմինիկեանները,

89. ՍՏ. ԱԳՈՆՑ, Աշխարհագրութիւն..., մասն երկրորդ, հա. Բ., էջ 141:

90. Մ. ԲժՇԿԵԱՆ, Ճամապարհորդութիւն ի Լեհաստան..., էջ 124-1125:

91. ՍՏ. ԱԳՈՆՑ, նշ. աշխ., էջ 141:

92. Ա. ԱԼԹՈՒՆԵԱՆ, Տեղեկագրութիւն հայոց գաղթականութեան, Թոքշան, 1877, էջ 134:

* Վիտոլդը լիտուական զօրքերով լեհական Վլադիմիլաւ Եագելլո թագաւորի հետ ղեկավարում էր Գրիւնվալդի ճակատամարտը:

որոնց թւում նաեւ հայ գոմինիկեանները, ենթարկւում էին այդ ուխտի գեներալին⁹³: Այս առումով շահեկան են Բարոնչի այն բազմաթիւ փաստերը, որոնք ցոյց են տալիս, որ Լիտուայի, ԿամենեցՊողոսկի, Գուանսկի եւ Լեհաստանի այլ քաղաքների հայ վաճառականութիւնը նշանակալի առեւտուր էր ծաւալել նաեւ Լիտուայում (Ռըս ջեյուվ, էջ 110, 162, 165-166): Լիտուայում հայերի ծաւալած աշխոյժ առեւտրի օգտին է խօսում նաեւ Լվովի քաղաքապետարանի մի դիմում-բողոքը Սիգիզմունդ Գ.ին (1587-1632), որտեղ կաթոլիկները տրտնջում են որ հայերը ոչ միայն արեւելեան առեւտրով են զբաղւում, այլ նաեւ մեծ չափերի առեւտուր են անում Երոպայում եւ Լիտուայում⁹⁴: Վերջապէս Լիտուայում հայոց գաղթավայրեր լինելու մասին բաւական պերճախօս կոռուան կարելի է դիտել դիւնական փաստաթղթերից Բարոնչի քաղած այն տեղեկութիւնը, թէ 1579 թ. Վիլնիսի բնակիչ Մուրադ Կերիմովիչը քաղաքի նշանաւոր վաճառականներից էր (Ժըվոտը, էջ 178): Վիլնիսում ժա. դ. 70ական թթ. հայերի բնակութեան մասին Լվովի քաղաքային վճռագրերից քաղած հաւաստի տուեալ է բերում նաեւ թ. Գրոմնիցին, ըստ որի այդ քաղաքում 1578 թ. բնակում էր Լվովից եկած ոմն Գրիգոր հայ⁹⁵: Ի նկատի ունենալով իր հաւաքած փաստերը, Բարոնչը եզրակացնում եւ պնդում է որ Լիտուայում հայկական գաղթավայրերի գոյութիւնը կասկած չի յարուցում «թէեւ նրանք ոչ մի տեղ եկեղեցի չեն ունեցեն» (Ռըս ջեյուվ, էջ 176ի տողատակի ծանօթութիւն): Լիտուայում հայկական գաղթօջախներ լինելու մասին Բարոնչի, Բիշովֆի եւ Գրոմնիցկու տեղեկութիւնները հարստացնող լրացումներ կան Ստ. Ռոշքայի, Ֆր. Զախարիասեւիչի, Ա. Ռուլէի, Լ. Տէէոդորովիչի, Լ. Կորվինի եւ այլով աշխատութիւններում: Ի յաւելում Լիտուամտած հայ ասպետների մասին Կրուսինսկուց քաղած տեղեկութիւնների, Զախարիասեւիչի, Ա. Ռուլէի, Լ. Տէէոդորովիչի, Լ. Կորվինի եւ այլով աշխատութիւններում: Ի յաւելում Լիտուամտած հայ ասպետների մասին Կրուսինսկուց քաղած տեղեկութիւնների, Զախարիասեւիչի, Անտոնինին գրել է, որ ինքը իր եպիսկոպոսական իշխանութիւնը Լիտուայի մեծ իշխան Վիտոլդից (1401-1430) է ստացել բացի այս՝ Զախարիասեւիչը հայերի մուտքը

93. S. BARACZ, *Rys drziejow zakonu kaznodziejskiego w Polsce*, t. 1, Lwow, 1861, էջ 205-206:

94. Ֆերդ. ԲԻՇՈՒԹՅ, Լիհահայոց հիմ իրաւութը, Վիեննա, 1890, էջ 36-37:

95. T. GROMNICKI, *Ormianie w Polsce*, Encyklopedia kościelna, t. 17, էջ 447:

Լիտուա դնում է Վիտոլդի ժամանակներից, ապա վկայում, որ Եռուզամայի մասին Սինասովիչի «Լեհահայ աղքեավիսկոպոսների վարքը քառեակներով շարագրեալ» լատիներէն գրում կարդացել է ԺԴ. դ. Վիլնիւսում ապրած անանուն մի հայ եպիկոպոսի մասին քառեակ⁹⁶: Ստ. Ռոշքայի «Ժամանակագրութեան» մէջ նշուած է, որ 1200 թ. Կիեւում հայեր էին ապրում, որտեղից նրանք յետագայում անցան Լիտուա, ուր «մինչեւ այսօր (1732 թ. Ռ. Հ.) բնակլում են հայ ազնուական նուրիջան եւ Գրիգորովիչ տոհմերը»⁹⁷: Ա. Ռուլէն Կամենեց-Պոդուսկի նշանաւոր Սոլթան (Զոլթան, Սոլցան) հայկական տոհմի մասին գրում է, որ սրանք Կիեւ մտած հայ խաչակիր ասպետների զարմից են, որոնց մի ճիւղը «մտաւ Լիտուա եւ այնտեղ սկզբնաւորեց այդ ազգանունով բաւական մեծ գերդաստան»⁹⁸: Ղ. Ինձինեանը կարծում է որ հայերը 1183 թ. եկեղեցի են կառուցել նաեւ Լիտուայում⁹⁹: Լ. Տցէոդորովիչը հայ ազնուական տոհմերին նուրիրած իր գրքոյկում, օգտուելով Բ. Պոպրոցկու աշխատութիւններից, նոյն Սոլթանների մասին գրում է, թէ սրանց մի ճիւղը 1584 թ. ապրում էր Լիտուա¹⁰⁰: Լ. Կորվինը եւս իր նշանաւոր աշխատութեան մէջ Սոլթաններին եւ նրանցից սերուած Արգարովիչների ու Զախարիասեւիչների մասին նշում է, որ սրանք ԺԵ. դ. են հիմնուել Լիտուա¹⁰¹: Նոյն աշխատութեան մէջ, հիմնուելով լեհ տոհմագէտ-պատմաբաններ Ա. Բոնիեցկու, Հիպ. Ստուպնիցկու եւ այլոց աշխատութիւնների վրայ, Կորվինը լեհահայ գերդաստաններ Բալեկիչների եւ Սիկոլաեւիչների մասին գրում է, որ Լիտուայից են սերում¹⁰², որոնք Լիտուայում բնակլում էին ԺԶ. դարից: Ստ. Ագոնցը օտար պատմաբաններից քաղած տուեալ-ների վրայ հիմնուելով գրում է որ 1062 թ. Կիեւ մտած ասպետների մի մասը ծառայութեան մտան լիտուական իշխանների մօտ, նրանցից ստացան մեծամեծ կալուածքներ, որոնք ժառանգեցին նրանց յաջորդ Մալախովսկիները (յետագայում իրենց

96. FR. ZACHARYJASEWICZ, *Wiadomości o Ormianach w Polszcze*, էջ 15-16, 36:

97. US. ՌՈՇՔԱՅ, ժամանակագրութիւն, էջ 127:

98. DR. ANTONI J., *Nowe opowiadania historyczne*, Բ. հրատ., Lwow, 1883, էջ 167-168:

99. Ղ. Ինձինեան, Հայաստանի Հայաստամեայց, Հայ. Ա., Վենետիկ, 1835, էջ 343:

100. L. THEODOROWICZ, *Nieco o heraldyce i rodach Ormian Polskich*, Lwow, 1925, էջ 15:

101. L. KORWIN, *Ormianskie rody szlacheckie*, էջ 154:

102. Անդ, էջ 70, 128:

աղքանունը դարձրին *Մալխասովակի*), *Սապիեխաները*, *Գրիգորիչները*, *Նուրիջանները* եւ *ուրիշներ*¹⁰³:

Վերոյիշեալ փաստերը բաւարար են պնդելու համար, որ Լիտուայի հայոց գաղթավայրերի սկզբնաւորումը առնուազն ժԳ-ԺԴ. դարերի իրողութիւն է:

Այսպիսով՝ Ս. Բարոնչը Ռեչ-Պուապոլիտայի եւ Լիտուայի հայոց գաղթավայրերի սկզբնաւորման հարցը քննելիս՝ հիմնականում ճիշտ է որոշել գաղթականութեան փուլերը, ինչպէս նաեւ գաղթավայրերի մեծ մասի սկզբնաւորման ժամանակը՝ աղքիւրների հանդէպ ցուցաբերելով ծայր աստիճանի զգուշութիւն եւ դրանց բժանդիր ընտրութիւն։ Բայց ծեռքի տակ չունենալով իրենից յետոյ հրատարակուած աղքիւրագիտական ժողովածուների ու պատմագիտական հետազօտութիւնների տուեալները, հասկանալի պատճառով առանձին գաղութների սկզբնաւորման հարցում (Լուցկ, Լվով, Կամենեց-Պոդոլսկ, Եազդովեց, Սնեատին), սիալներ է թոյլ տուել՝ զրանց ձեւաւորումը մօտ մէկ հարիւրամեակ ետ բերելով արդի պատմագիտութեան մէջ ընդունելի համարուող ժամանակներից թէեւ ըստ մեզ, այդ տեսակէտներն էլ են վիճելի, քանի որ շատ գաղութների սկզբնաւորումը անհիմն պատճառաբանութիւններով ետ են բերւում։ Մեր համոզումով, անվիճելիօրէն հայահիմն համարուող Օրմիանէ, Օրմեանկի եւ Կուտի բնակավայրերի շարքը պէտք է դասել Լվովը, Կամենեց Պոդոլյակը, Լուցքը, Եազդովեցը։ Ստանիսլավի, Զամոզտիէի հիմնադիրներից պէտք է համարել հայերին, որոնց ջանքերով այդ քաղաքները ծաղկում ապրեցին եւ դարձան ժամանակի առեւտրա-տնտեսական խոշոր կեղ-ըոններ։

ՌԱՖԱՅԵԼ ՀԱՄԲԱՐՁՈՒՄԵԱՆ

103. ԱԳՈՆՑ, Աշխարհագրութիւն չորից մասանց աշխարհի, մասն եր-կորող, հա. Բ., էջ 95։